

Nimalisela ani chu kan
bawhchhiatnate
vangan hliamin a awm
a, kan khawlohnate
vangan vuak thilinin a
awm a...a vuakna
vualtea tihdamin kan
awm ta. (Isaia 53:5)

KRISTIAN THALAI

APRIL
2013



Kristian Thalai Pawl Chanchinbu Thla tin chhuak

Vol V No. 2



Lungleiah KTP Rorel Inkhawm Tluang takin...



Kristian Ṭhalai Pawl chanchinbu thla tin chhuak

1970-a chhuah ṭan ■ Kum 43-naa waw 4-na ■ Chhuah tawh zat : 415

Editor :

R. Lalhmingthanga

Joint Editors :

T.Upa Lalhruaizela

Pu Lalmuanpuia Hrahse

T.Upa Lalremsiama

Dr.H.Lalthanzara

Manager :

Lalmuanpuia

A lak man :

Kum khatah - Rs. 60.00

Copy khat - Rs. 5.00

*Thu chhuah tūr nei chuan
Editor, Kristian Ṭhalai, Synod
Office-ah thawn tūr a ni a; a la
duh chuan KṬP Office-ah a man
pék lāwk a ngai.*

Office Phone : 2326372/2335821

**E-mail : kristianthalai@yahoo.com
centralktp@gmail.com**

Visit us :

cktp.blogspot.com

www.facebook.com/centralktp

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10 Thil ṭha ti atān Krista
Isuaah chuan siama awmin, ama
kutchhuak kan ni si a, chu thil ṭha tih
chu kan awmna tūrin Pathianin a
buatsaih lāwk a ni.

Thil tumte

1. Isua Krista rinna leh amah anna
kawnga ṭhalaite hruai.
2. Kohhran kut ke ni tura ṭhalaite
buatsaih.
3. Kohhran hnathawh tihpuittlin.
4. Krista Chanchin Ṭha puan darh.

A CHHUNGA THU AWM

1. Hnehtu niin a tholeh	2
2. Kan Kohhran pianhmang	6
3. KṬP leh Facebook	11
4. 2013 KṬP Rorel Inkhawm thlirletna	13
5. Media hmanga ṭhalaite rawngbawlina.....	17
6. Lung a leng lawk mange	21

Editorial	1	Hringlang tlang.....	23
Rimāwi	25	Hrisélna	27
Kantu	28	Keimahni.....	29-32



DUHTHUSAM

Mihring nunah mamawh engkim a neih theih a, mahni chakzawng leh nuam tihna lama kal tura harsatna neih loh te, duhlohna lama kal lo thei dinhmun a din hi American dream an ti .

Kan khawvel hun hman mekah hian thalaite leh ringtuten nitin nunah khawvela mite nena intlansiakin hun kan hmang fo thin. Khawvel chuan hausakna, sum leh pai, thiltihtheihna, ropuina a thlahleh thin. Ringtu leh ringlote hian danglamna tamtak kan nei tur ani a, mahse kan ngaihtuahna leh duhzawng chu khawvel ropuina alo ni leh thin. Pathian hre lo leh ngaihtuah lova hun hmang mek te zingah hlimna zawnga chet chhuah te, midangin an selna ngaihtlak loh hi hlimna ani tih te, mahni tana tha turah chuan eng thil pawh sawisel nghal zel hi a tha zawk tih te, hriatna, thiamna hi mi zinga min ti tlangnel tu leh mi dangte hruai theihna hmanrua tha tak ani tih te, buaina leh harsatna midang tana siamtute te hi khawvelin a ngaihven thin ani tih thuah te an chiang hle.

Isua Krista zuitute duhthusam enge ni ang le? Khawvela chhuan tur nei lo leh mi rethei kan tih te hian Pathian chhandamna thu hi an pawm hma zawk em? Mi retheite chu Pathian leh thiltitheite leh midanga innghat an ni a, hausate erawh chu sum leh pai leh thiltihtheihnaah an innghat thin. Retheite chuan thlamuanna leh inngahna midangah an neih avangin mi pawimawhah an in ngai ngai lo , mi hausa erawh chuan midang aia pawimawhin an in hria a, chutianga enkawl chu an beisei thin. Rethei chuan bil nun an ngai pawimawh lova huho nunah an innghat nasa, hausate erawh chu ho nunah an innghat ve lo, retheite chu khawvel mite nena intlansiak tumin ke an pen nasa lova, retheite chuan an mamawh leh khawsak nawmna tur thil an thliar hrang thiam a, hausa tan erawh khawsak nawmna chu an nitin mamawh ani tawh zawk. Retheite chuan an chung a thil thleng tur harsatna pawh nise an nghak thei a, hausa tan erawh nghaktu nih a har hle. Harsatna hi retheite chuan tuar chhuah theih ani tih an hria a, Pathian thu hi an tan Chanchin Tha ani zual bik. Pathian zui turin chan leh hloh tur tlemte an nei a, an ui lo. I duhthusam enge ni?

HNEHTU NIIN A THOLEH

— Rev. Lalrinmawia
Leader, Central KṬP

*Kha mi kha thihna phuarnate
chu a phelhsak a, a khaitho ta
a. Amah chu thihna chelh
hlen rual a nih loh avangin.
Tirh 2:24*

al Isua thawhleth thu hi khawvel thil thlengah chuan thil danglam ber a ni a, khawvela thil la thleng ngai lo a ni. Apostolte thu hril ber a ni a, hril nuam pawh an ti hle a ni. Kan hmuh leh kan hriat hi sawi lovin kan awm thei lo an ti ringawt reng a ni. A chhan chu hnehtu chanchin sawi aia nuam hi a awm lo reng reng a ni. A hmu chiangtu leh a hre chiangtu tan chuan sawi loh theih pawh a ni lo reng a ni. Hla phuahtu pawhin 'sawi nawn a nuam a ni' tiin a lo puang chhuak ngawt mai a ni. Kan Lalpa hian enge maw a hneha, chutiang taka puan chhuah nuam an tih chu hriat a tul hle mai a, lo ngaihtuah chhunzawm ve teh ang.

Milem biate ni Sunday chu Lalpa Ni a lo ni ta. Khawvel miten Ni pathian (Sun) an be thin a, felna ni tiin an serh a, an hmang thin. He mi niah kher

hian Kan Lalpa chu ropui taka kaih thawhin a awm ta a. Zawlnei Malakia lo sawi lawk Felna Ni chu a lo lang ta. Felna Ni a thlaa a tihtamna nen a lo chhuak ang (Mal 4:2) a tih ngei kha a lo thleng ta. Kan tana Felnaa siam dik tak chatuana LAL turin Pa Pathianin a kai tho ta. Sun Pathian an lo biakna ni chu Krista thawhlethna chuan luahlanin Isua chawimawina niah an lo hmang ta. Chumai a ni lo, Pathian nu Easter tana inthawina urhsun tak an hlanna ni chu LALPA hnehtu nia ropui taka a thawhleth ni a lo ni ta. Easter tih hi thawhlethna tihna a ni lova, Lal Isua thawhlethna ni hming a tan hman a ni. Anglo Saxonho chuan nipui Pathian an be thin a, chu an pathian hnenah chuan urhsun takin inthawina an hlan thin. Chu urhsun taka an inthawi ni ngei maiah chuan Isua Krista chuan misualte tana inthawina hlan zovin Pa Pathian chuan ropui takin a kaitho ta. Chuvangin nipui Pathian hnena inthawi thinte chuan an Pathian hnena inthawi tawh lovin ropui taka tholeh

Krista Isua hnen ngeiah chuan inthawina an lo hlan ta.zawk a ni. A hming pawh thlak chuang lovin Tho leh Lalpa chawimawi nan an lo hmang ta. Khawvela sakhaw lo awm tawh sa chu hnehin a rawn luahlan ta a ni.

Khengbettute a timualpho :

Lal Isua thawlehna hian khengbettute thiam loh a chantir dan hi a ropui em em a ni. Kan hriat theuh angin kan Lalpa chu misual thi tlak tiin khawvelin a chungchang thu an relsak a nih kha. Kha thubuai kalah khan thu chiang a awm thei lo. Khawvel chuan Lal i ni lo tiin an rorelna hmaah chuan an puh a, Isua erawh chuan LAL ka ni a sin tiin a tang a nih kha. Mahse thuhretu pakhat mah a nei si lo. Tichuan khawvel chuan Lal a nih lohzia lantirin hmuhsitna tin reng nen chilchhakin an sawisa a, thiam loh chantirin an khengbet ta a nih kha. Khenbeh niah chuan khawvel chu an lawm hlein, hneh hlein an inhre ngei ang. Mahse van khawpui lam chuan Isua chung a rorelna chu an la titawp ve lo. LAL a nihzia leh thiam a chanzia lantir nan ropui takin Pa Pathianin a kaitho ta. Lal a ni lo titute khan enge an sawi tak ang le. Van khawpuiin a dikzia leh a LAL zia leh thiam a chanzia an rawn puang a, thihna hneha a thawhle h niah

chuan misual tia khengbettute tan chuan zaka kimkit ngawih ngawih mai loh chu sawi tur a awm tawh lo. Misual a ni tia hektute dik lohzia chu thawhle h niah chuan a rawn timualpho chiang ta hle mai. Vawiina Isua LAL na leh ropuina puang duh lotute tan pawh hian zahthlak tia an kimkit vawng vawng hun a la thleng ngei ang.

Hnehtu hi chawimawi tlak a ni :

Khawvel hian indonaa hmelma hneha lokirte chu an chawimawi a, ropui takin chawimawina zawng zawng nen an lo hmuak thin. Kan Lalpa pawh thihna leh thlan hneha Pa Pathianin ropui taka a thawhle h niah chuan van mite chuan lawm hla ropui tak an sa ta a ni. Ropui taka a thawhle h niah chuan vantirhkoh a singa sing hmun sing tam tak, a sanga sang hmun sang tam takte chuan 'Beramno talh tawha hi, thiltihtheihnate, hausaknate, finnnate, chaknate, chawimawinate, ropuinate, malsawmnate hmu tlak i ni e'(Thup 5:11-12) tiin van khawpuiah chuan chawimawi nan hla an sa a ni. Hnehtu a nih hre chiangtute chuan hnehna hla sain an chawimawi thin. Thihna chelh hlenrual loh, Pa Pathianin ropui taka a kaihthawh LAL ISUA hi, a

thawleh zara nun neia, van khua leh tui nihna changa, hnehna kawng zawhna a tel ve te hian chawimawina leh ropuina zawng zawng hlan ve ang u.

Thawhlehnain van lam thuruk a puang :

Mihring hriat fiah phak rual loh thuruk chu Lal Isua thawhlehnna hian arawn puang chhuak ta a ni. Khawvel mi mitah chuan hnehtu chuan a hneha chu che thei lovin a siam a, tharumin a nam bet a, a duh duh a tih tir thin a ni. Chak zawk chu a chungnung a, a khingpui chu a tih lum thei hial a ni. Isua erawh chuan a hneh loh, a chung a duh duh an tih theih lai pawhin "Keiin khawvel ka ngam ta" tiin a puang a ni. Khawvel chuan hnehtuah an puang ngai lo vang a, hnehtuah an pawm ngai hek lo vang. Mahse, Pathian thiltihtheihna chu chak lohnaa tih famkim a ni thin. (2Kor 12:9) Krista chak loh lai tak kha Pathian chakna lantirna chu a ni si. Mite hneh lova an kuta a tluk luh lai chu khawvel a ngamna a ni si. Khawvel leh hmelmate chuan kan hneh ta, kan ti boral ta an tih hnu khan thihna leh thlan a hnehna chu a lo lang ta a ni. Krawsah khengbet thei lo sela khawvel chuan hnehtuah an puang ngei ang. Rom sipaiten an sawisak, an khenbeh, an

tihhlum a ngei kha vawiina ringtute pawla ti chaktu a chu a ni si. An tihhlum, an phum a ngei kha nunga a hmangaihte hnena inlar a kha a ni si. Rinnaa zawmtute chuan A nung, A nung, Krista Isua a nung, kan leng dun thin kan inkawm thin, nun kawng zim takah hian, A nung ka thinlungah. (KHB No292) tiin an puang chhuak thin. Lal Isua thawhlehnna van lam thuruk inpuang hmutute hi tun thleng pawh hian khawvel buaina leh harsatna hian chim thinin, engmah nei lo angin awm mahse hnehtu nia hlima zai thinte chu an ni si. Tholeh LALPA chuan nunga a pawl tlat thin avangin setana phuarna ah pawh phelhin an awm thin.

Mamawhtu hnenah a inlar :

Lal Isua chanchina thil danglam tak awm chu an khenbeha, a thiha, an phum tawh hnu pawha mamawhtu tana dinsak tura nunga a lo lang thin hi a ni. A tel lova nung thei lote tan vawiin thlenga nunga a inlan thin hi a mak danglamna chu a ni. Mari Magdalini, a kawchhunga ramhuai pasarih a hnawhchhuahsak khan Lal Isua tel lova nun a ngam lo a ni ang. Thlana kal hmasa ber a ni reng a. Thlan ko tlangah chuan a thu reng a, ruang dai pawh ka LALPA tiin a la sawi a, ruang dai la duh khawp rilru a pu a ni.

Chutiang mi hnenah chuan Isua a inzep thei lo. A tholeh ta tih a puang a, nungin a inentir nghal a ni. Vawiin thleng pawh hian mamawhtute tan malsawmna ni turin phuar phelhin nungin a lang thin a ni. Amah mamawha a hnena lo kal chu a tawpkhawk thlengin a chhandam thei, anmahni chhandam tura Pa in thihna phuarna a phelhsak a, a mite a tawngtaisak theih nan chatuan atan a nun avangin. Mamawhtu nilem lote hnenah erawh chuan nungin a inentir ngai lo. Jerusalem khawpui mi tamtak ten a tho leh tih an awih lova, an hmu lo baw. Thutak hriattir hi a lo kal chhan a ni a, thutak tling lo deuhva sa khaw kalpuituten nungin an hmu thei

lo. Pathian hriattir leh a hnathawh chauh a tum avangin Pathian aia mahni inhmangaihte hnenah a nungin a inlar ngai lo. Pathian hming chhala mahni ropui nan rawngbawltuten nungin THOLEH LALPA an hmu thei lo. An tan hnawksak anih avangin.

Pa Pathian chuan thlana phum Isua chu a hmangaihten nunga an pawl theihna tur leh a mite a thlamuan a, an tan chatuana a tawngtaisak theih nan thihna phuarna phelhsakin ropui takin a kaitho ta. Kan tana thia tholeh LALPA ngei chu chawimawina zawng zawng hlan ve ang u♦



PA, MIN HMANGAIH EM?

■ *Zan khat chu zan dang aiin pisa kan bang tlai a. In ka thlen chuan ka fapa, Johnny-a chu a lo mu dawn mek a. Min hmuh chuan min be mai lovin a ngawi vang vang a, nakinah chuan, "Pa, darkar khatah cheng engzat nge i hlawh?" tiin min zawt a.*

Kei chuan, "Dollar 20. Engti zia nge Johnny?" ka lo ti let a, ka fapain darkar khata ka hlawh zat min zawh chhan awm reng reng chu ka hrethiam lo va. Johnny-a chuan min chhang mai lo. A ngawih vang vang hnu chuan, "Pa, dollar 10 min lo pe teh a," a ti leh ta a.

Ka ipte atangin dollar 10 ka phawrh a, Johnny-a chu ka pe nghal a. Pawisa ka pek pah chuan pawisa chu eng atan nge a tih tih ka zawt zui a.

Johnny-a chu hlim zetin a nui hawk hawk a, chutah, "Pa, ka lawm e. Tihian darkar khat chhunga i hlawh zat ka nei tling ta. Dollar 20 hi ka pe ang che a; tichuan darkar khat chhung min infiamtui ta che," tiin min chhang ta a.

— Jeremy B. Hostler

KAN KOHHRAN PIANHMANG

— C.Vanlallawma
Mission Veng

Khawvel chanchina kan Kohhran lo pian chhuah dan hi tawi tein sawi dawn ta ila, min hringtu Welsh Kohhran chanchin te, India ram Presbyterian Kohhran chanchin te kan thlir let a t̃ul ang. Kan history tlangpui chu hetiang deuh hi a ni -

Hringtu Welsh Kohhran

England Harhna : Kum zabi 18-na laihawla 'Evangelical Awakening' an tih mai Harhna Ropui khan Sap ram leh America khawmualpui khu a tuam chhuak a. Chuta harhna hruaitu lian pahnihte chu George Whitefield-a leh John Wesley-a te an ni. He mite hi Anglican Kohhran mi ve ve ni mah se Biak In lama an hnawn tak deuh hnu chuan an harhna kha 'Methodist Revival' an tihsak ta deuh mah a, an kalmang avanga pawn lam mite phuhsak a ni. Chutih ahnu-hmanah an hotu lian pahnihte chu rei lo teah thurin lama an inrem theih loh avangin an kal hrang ta tlat mai a, a mak hle. Chutia Methodist Movement t̃uang hniha a kal ta chu Whitefield-an Calvin-a pawm lam (Calvinistic Wing) a hruai a, Wesley-an Arminia pawm lam

(Arminian Wing) a hruai thung a. Kum 1743 a tang pheih chuan heng pawl hnihte hi an inthen fithla ta law law a ni.

Wales Presbyterian : Wales Kohhran tan 'Varparh Arsi' an tih t̃hin Griffith Jones (1683-1761) chuan Whitefield-a pawmin Calvinistic Methodist Church of Wales lung a phum a. Chung lai chuan Calvin-a huvang veka siam England Kohhran Thurin 'Trinity-nine Articles' (1563) leh England & Scotland ram Presbyterian Kohhran Thurin bu lian 'Westminster Confession' (1647) te chu an tan chaw tui tak ang a ni.

Hun a han kal leh hlek a, Wales ram Calvinistic Methodist-ho chuan kum 1811-ah khan Presbyterian Kohhran Upa thlan dan ngei hmang tanin, England Kohhran (Church of England) a tang chuan in-mual an vawm hrang ta a, rei rial lovin anmahni pual thurin tur an puahchah zui ve ta a ni. An peih fel veleh kum 1823 khan Aberystwyth Inkhawmpui (Association)-ah an thurin thar chu an pawm a. Hei hi Wales ram Presbyterian Kohhran thurin pui ber, 'Welsh Confession' an tih chu a ni. Thirty-nine Articles leh Westminster Confession tlawhchhanin, Wales ram kohhran rilrem turin an siamrem a, thu hlawn (articles) hrang hrang 44 lai awmna, John Calvin a zirtirnaa innghat thurin sei tawk tak a ni. He thurin hi Pu Zosaphluian 1909 vel khan Mizo

kohhran tan a lo letling a, kan thurin bu hmasa ber a ni ve leh a. Kum 1912-ah chhut 2-na, 1941-ah chhut 3-na thlengin sem darh a ni.

India ram Presbyterian Kohhran

Kan Thurin Sawm hi : Tun thlenga kan hman kan Thurin Sawm hi erawh chu min hringtu Welsh kohhran kutchhuak a ni ve lo. Tute phuah nge? Engtik huna siam nge? A siamnaah Mizo an tel ve em? Heng hi kan inzawt thin a, a neitute hian kan hre Chiang ngai lo. Heng zawhna hi kan chhan theih hma hian Chanchin Tha kum za kan thlenga, Gospel Centenary kan lawm fel vekhman a ni.

India ramah hian Presbyterian kohhran hi hmar chhak kilah PCI tiin kan awm lêt lêt chauh tawh a, kan tlêm hle mai. India ram hun kal tawh kan thlir lêt erawh chuan missionary hun ropui, 1800 leh 1900 inkar kum za chung khan he India-Hindu ram thimpui vei hian khawvel hmun dang aţangin Presbyterian hnahtlâk missionary te an lo feh lût zung zung a¹. An rawngbawlina leh an sulhnu pawh a ropui hle. Zirna leh tihdam rawngbawlina lama an hnathawh te chu vawiin India ram hian a rah a seng a, a hlâwkna a têt mêt a ni².

India rama Presbyterian hnahtlâk mission-ho chuan tirtu kohhran leh Board a hman miau avangin a tir lam hun engemaw chen kha harsatna neuh neuh an tâwk a, chung avang chuan rawngbawlho theih tulzia an hre

nghal a, thawhho dan kawng an dap ta a ni. Chutiang tulzia ziaka pamphlet 1863-a theh darhtu, Scottish Presbyterian upa J.T. MacLagan-a chuan kawng a han sial hmasa a. Thahnemngai taka bei zuitu chu Northern India Synod-a rawngbawltu, American Presbyterian missionary Rev. Dr. J.H. Morrison, a hnu lama Chief Architech of Presbyterian Union in India an tih tak chu a ni. Anni Synod chuan thawhhona kawng zawngtu Committee dinin, 1871 January thla khan Church of Scotland, Free Church of Scotland, United Presbyterian Church of Scotland, American Presbyterian Church, leh Reformed Presbyterian Church(USA) aiawhte an ko khawm a, unau anga ţanho dan an ngaihtuah ţan a. Chung ho chuan tha tho takin chumi kum tâwp November ah Allahabad Conference kovin zau zawkin an ngaihtuahho leh a. Presbyterian hnahtlâk talina thawhhona tha neih mawlh chu an lungkham a. Anni hovin an rel angin 1872 December thlaah Allahabad Convention an ko leh a, chuta Presbyterian minister leh upa 42 kal khawm te chuan ngun taka engkim an ngaihtuah hnuah 1873 November ni 26 khan 'Indian Presbyterian Confederation' an han invuah lailâwk(chhin) a. Hmathlîr tha lehzual neiin, dan bu te an duang zui a. Tichuan an Dan Bu siam thar te chu pawmin December 23-24, 1975 khan 'Presbyterian Alliance of India'(PAI)tiin ţanhona

pawl an indin ta a ni. Thiltum pawimawh bik pali an nei a -

- (1) Thu khat vua leh inngaichâng tawna India ram Presbyterian kohhran thawhhona kawng zawn.
- (2) Thawhho dan leh inñanpui tawn dan kawng dap.
- (3) Chanchin Ṭha hna thawk thei tura tualchhung kohhran tihngheh leh tihchangtlun.
- (4) India ram Presbyterian kohhran ding tharte inpumkhatna tur ngaihtuah³.

Kum 1877 Decemberah Presbyterian Alliance rorel inkhawmpui(council) hmasa ber Allahabad-ah an ko a, chutah chuan kan sawi tak Rev. Dr. John Hunter Morrison kha Moderator a ni a, ziaktu(clerk)chu James Williamson a ni. Thu tam tak an ngaihtuah a, anmahni theuh pawh inbih chiangin India ram Presbyterian kalhmang tur te an sawiho a, phûr takin kalphung inang tlâng neih dan tur an ngaihtuahho a. Inhriat tawn nan 1888 aṭang khan chanchinbu Indian Standard an tih chu an chhuah ta nghe nghe.

Mahni kohhran nihna hlip si lova mission field-a pawm tlân theih tur kalhmang leh thurin duan chhuah chu thil awlsam a ni lo. Tirtu kohhran(home church)mitmei ena indâwr a ṭul ṭhin a, chu chuan a tiharsa a ni. PAI Doctrine Sub-Committee Convener Rev. K.S. Macdonald-a te chuan sawiho nikhuain inghahna thurin atan Tirhkohte

Thurin emaw, Nicea Thurin emaw, England Presbyterian Thurin Article 24 emaw, India ram Scottish Kohhran Pathumte Thurin emaw zingah duh ber thlan mai a ṭha em tih te an dinpui a. India ram kohhran tiak tir zinga mission pawl hrang hrangte inhman ṭawm tur a nihna chuan ngaihtuah a ti harsa baw. Ngun taka an ngaihtuahho hnu chuan Scot-ho thurin chu tlai deuh hnuah an thlang ta a.

Kenneth Lawrence Parker-an a ziak dan chuan he thurin hi Scotland Presbyterian Assembly hnuaia Foreign Mission Committee-in, 1878-a a din Doctrine Sub-Committee te kutchhuak a ni. A tir takah chuan India chhima Scottish Kohhran pathumten tualchhung kohhran rawngbawltu (Office Bearer) an nemngheh turte thuvawn atana an phuah a ni a, thu hlâwm(article) sawm pakhat a awm. Chu thurin chuan an lung a dum deuh avangin PAI General Assembly 1882 chuan an thlirho a, thu pawhchah mai a harsat avangin ngaihtuah thatah an khêk a. India chhima Scottish kohhran pathumte⁴ erawh chuan ihê lovin an hmang. Chutia anni'n rei fe an hman hnu chuan kohhran pawl dang nen an thawhhona, Synod of Southern India chuan 1901 khan thurinah an pawm(adopt) a. Hemi hnu lawk 1904-ah, article 11 chu 12-ah siamin India hmar lam Presbyterian kohhran, 'Presbyterian Church in India' tia inzawm khawm tate chuan thurinah an

pawm ve leh a('Presbyterian Alliance in India' tia an thawhho chhung khan thurinah an la hman lo tihna a nih chu). Tichuan 'The Synod of Southern India' thurin 11 chu 'Presbyterian Church in India' thurin sawm leh pahnih(Twelve Articles of Presbyterian Church in India) a lo ni ta a. India ram Presbyterian Kohhran(PCI) chu 1924-ah, United Church of Northern India(UCNI)tia kohhran pawl dang nen an inzawm khawm hnu thlengin UCNI chuan thurinah an hman zui zel a. Keini pawhin articles 12 chu 10-ah kai tawin 1924 aṅa tun thlengin thurinah kan hman zui ta a ni.

Thurin chhuanawm

Kan thurin hi a tein a tawin a, hman tu leh pawmtu an lo zau hle. Sawi tham leh chhui zel tham a ni. America chhim leh hmar aṅa te, Canada leh Australia aṅa tea Korea rama thawktu missionary ho pawhin 1905-a Korea ram National Presbyterian Church an din hlimin, he thurin hi Asia khawmualpuia Presbyterian Mission zawng zawngte thurin inṅawm tlan atan ṅa tawk hlea ngaiin 1907 khan an lo pawm(adopt)ve nghal a. Hun lokal zelah Korean Presbyterian kohhran chu inṅen darh nasa hle mah se a tam zawkin thurin bulpuiah an la ngai reng a, tun hnu lama inṅhui khawm leh nan an la hman theih an beisei hial a ni. Tun laia India Hmar

Kohhran(Church of North India), mihring maktaduai 20 dawn lai awmnaah hian UCNI kan tih khan a chhawm lut a, tun thlengin thurinah an vuan mēka; hman tu kohhran mipui kan lo tamin kan lo inzau zau hle a nih chu! Tichuan he thurin hi Asia khawmualpuia Protestant mipui maktaduai tam takin thurinah an lo hman a, ram hrang leh kohhran pawl tam takin inngahna tlāka an ngai a lo ni reng mai. Korea aṅa China thlengin he thurin hian min lo phuar khawm a⁵. A pawimawh angin a neitute hian kan lo hre tawk lo zawk a ni. Chutiang taka thurin pawimawh ni si, kristian thurin la khāwmtu(compiler) leh chhuitute hian an lo hre lo em em mai a, a mak hle⁶. Keini zawngin hre ching turin i zir zel ang u.

References and Notes

- 1 Kum 1900 hma lama Presbyterian hnahtlak mission, India rama lo lut kha sawi mawh mawh tham a ni a, an thawhna hmun leh thawh tan kum nen henge hi a ni e -
- American Board of Commissioners for Foreign Missions, Bombay(1813), Madras Presidency(1834)
- United Free Church of Scotland, Foreign Missions Committee, Bombay(1823), Poona(1824), Bengal(1830), Madras Presidency (1837), Central Provinces and Bengal(1846), Ajmere-Merwara (1860) Hyderabad(1862), Rajputana (1863), Bihar and Orissa(1870), Assam(1890)
- Church of Scotland, Foreign Missions Committee, Bengal(1830), Madras Presidency(1836), Punjab and Kashmir(1857)
- Presbyterian Church in the USA, Board of Foreign Missions, Punjab and Kashmir(1834), United Prov-

inces(1836), *Bombay*(1853), *Central India*(1874), *Assam*(1905)

- *Presbyterian Church of Ireland Foreign Missions, Bombay*(1840)

- *Church of Scotland Women's Association for Foreign Missions, Bengal*(1840), *Madras Presidency*(1843), *Punjab and Kashmir*(1861)

- *Calvinistic Methodist Church of Wales Foreign Missions*(*Welsh Presbyterian*), *Assam*(1841), *Lushai Hills*(1897)

- *Reformed Church in America, Board of Foreign Missions, Madras Presidency*(1853)

- *United Presbyterian Church, Board of Foreign Missions*(USA), *Punjab and Kashmir*(1855) *North West Frontier*(1921)

- *United Presbyterian Church, Women's General Missionary Society*(USA), *Punjab and Kashmir*(1855), *North West Frontier*(1921)

- *Presbyterian Church of England, Foreign Missions Committee* (*Bengal*(1862))

- *Presbyterian Church in Canada, Board of Foreign Missions, Central India*(1876), *Rajputana*(1914), *United Provinces*(1904)

NB : *Kum 1900 hnu lamah Associate Reformed Presbyterian Church*(USA), *Board of Foreign Missions, Punjab and Kashmir*(1906), *Presbyterian Church, New Zealand Foreign Missions Committee, Punjab and Kashmir*(1910), *Reformed Presbyterian Church*(USA), *General Synod, Board of Foreign Missions, United Provinces*(1914) etc.

2. *Entirnan, Kolkata khawpuia Scottish Church College*(1830) *te, Madras Christian College*(1835) *te, Voorhees College, Vellore*(1898) *te, Allahabad-a Ewing Christian College*(1902) *te, Lahore-a Forman Christian College*(1847) *te, Sialkot-a Murray College*(1889) *te, Mumbai-a Wilson College*(1832), *Rawalpindi-a Gordon College*(1893) *te, Nagpur-a Hislop Col-*

lege(1883) *te hi*(*Tuna Pakistan hi India ram a nih vek lai a ni a*) *Presbyterian hnahtlakho din a ni a. Hospital leh medical college ni se Agra Medical Mission Training Institute*(1881), *Miraj Hospital and Training Institute*(1889), *Vellore Christian Medical College and Hospital*(1900)etc. *te hi kan kohhran hnahtlakho sulhnu vek a ni.*

3. *K.L.Parker, The Development of the United Church of Northern India, (A Doctoral Dissertation), 1935. Hei hi kan hriatna hnar ber a ni.*

4 *Heng Scottish kohhran pathum hian rei tawh an thawh hnuah Congregational Mission nen infinin 1908 khan 'South India United Church' tiin an inzawm khawm a, tun hnuah kohhran pawl dang nen India Chhim Kohhranah an in chhung khawm ta vek a.*

5 *Jae-Buhm Hwang, The First Asian Ecumenical Confession of Faith : The So-called Twelve Articles of Faith of Many Asian Protestant Churches, The Ecumenical Review, July 2011*

6 *'The Creeds of Christendom'*(3 Vols) *ziaktu Philip Schaff and David S.Schaff*(eds) *ten an lehkhawh an telh lo va; Indian Church Historian Stephen Neill-an kam khat pawhin sawi lanna a nei lo. Tun hnaia chhuah, 'A Dictionary of Asian Christianity' ah tihlan a ni lo leh a. Jaroslav Pelikan and Valerie Hotchkiss*(eds), *Creeds and Confessions of Faith in the Christian Tradition, (Volume 3, Yale University Press 2003) ah telh a ni hek lo. John H.Leith-a ziak, Creeds of the Churches* (1982)-*ah a lang na hek lo. Ziaktu pakhat William A.Curtis-a erawh chuan 1911-a a lehkhawh, 'History of Creeds and Confessions of Faith in Christendom and Beyond' ah 'the twelve Indian Presbyterian articles' a ti a. "Kum 1890-a China ram Presbyterian mission kohhrante inpumkhatna" tiin a sawi(Curtis, p.283,284).*

KTP LEH FACEBOOK

— Rinfela Zadeng
Zobawk Vengthlang Branch

II Timothea 4:5 — *Nang erawh chu engkimah fimkhur la, hreawm tuar la, Chanchin Tha hriltu lam hna thawk la, i rawngbawlna kha hlen rawh.*

Facebook khawvel

Kristian Thalai Pawl zingah hian Facebook (FB) hre lo leh hmang ngai lo hi kan tam a rinawmloh a, chuvangin sawifiah kual lo mai ila. Tuna kan khawvel hman mekah hian a bika thalaiten hun kan khawhralna tam ber chu FB hi a ni ti ila kan tisual tam awm lo e. Rawngbawlna, chanchin thar leh thu leh hla inthawn nan te kan hmang a, a tangkai zawnga kan hman chuan tunlai khawvelah chuan thil hlu leh tangkaiber pawl a ni tih kan hre theuh awm e. Keini KTP-te hian engtin nge FB kan hman ve thin? Hnathawhloh phah nan leh zing thawh tlai phan nan kan hmang thin em?

Eng nge ka Like thin?

Ka home-ah ka lut a, noti-

fication tam tak ka neih te kan en thla dan dan a, milem leh thlalak, thu leh hla te ka hmu a, chung zingah chuan eng nge ka *Like* thin le?

KTP thiltumte zingah-Krista Chanchin Tha puandarh tih a awm a. Krista Chanchin Tha puandarhna lam kawnga min tanpui thei thu leh hla, thlalak leh milem te ka *Like* thin em? Nge thu ho mai mai leh milem/thlalak ho mai mai, chhungkuuaa enho dial dial tlakloh te ka *Like* thin?

Zan rei tak tak thleng ka FB(online) a, ka thil *Like* te hi Lal Isua hian min *Like* pui ve angem le?

Eng thu nge ka sawi thin?

Ka FB ah hian eng thu nge ka sawi(status update)thin le? KTP-ah OB kum tamtak ka lo ni tawh a, tuna ka FB-a ka thusawi leh ziah mekah hian 'Isua Krista rinna leh amah anna kawnga thalaite hrui' thei tur thu ka ziah em? Tuna ka thuziah mek hi Lal Isua hian a lo *Like* in comment min pe a ngem le?

Eng Group-ah nge ka awm?

Ephesi 2:10-ah thiltha ti tana siam kan nih thu leh chu thil tha tih chu kan awmna tur a Pathianin min buatsaih lawk

a nih thu kan hmu a. Tuna FB-a ka awmna Group-te hi thil tha chu anni em le? Zahmawh leh Film tha lo awmna Group-te hi em ni ka awm duhna leh ka mit leh beng titlai tu?

'Kohhran hnathawh tihpuitlin'duh kei Kristian Thalai hian tuna ka awm mekna Group a tang hian Kohhran hnathawh tihpuitlinna tur thil ka hmuchhuak zo a ngem?

Eng thu in nge kan inkawm (chat) thin?

Zan rei tak tak thlenga tuemaw nena kan inkawm (chat) hian engthu nge kan sawi thin? 'Kohhran kutke nitura thalaite buatsaih'-na thu kan sawi dun thin em? Nge Setana kuthnu niawm tak thu kan sawi dun melh melh zawk?

Tuna ka thusawi (chat) mek hi Lal Isua nen pawh a sawidun tlak thu a ni em? Lal

Isua titipui (chat) tlak ka ni em? A rawnbawltur a a chhnadam Kristian Thalai ka ni si a.

Engkima fimkhur

II Timothea 4:5-na thu ang hian engkima kan fimkhur hi a va pawimawh em! Tunah hian lo boral ta ila, kan FB Account hi belhchian (check) tlak a ni a ngem? Kan thil Like te, kan Comment-te leh kan titi (chat)-te hian kan nun nasa takin a eiral thin em?

Kan nun chhungril leh kan hunawl min luahkhattu tamber Facebook hi keini KTP-te hian Lal Isua Like ve theih, Comment ve theih leh Lal Isua awmve na tlak Group a nih theih nan i hawng thar ang u. Setana awmna leh a duhzawng thilte kan tarlanna hmun atan kan FB te kan hmang a nih chuan kan nun hian a tuar ngei dawn a. Lal Isua hmingin Facebook hmang thin zawng zawng ten kan Account i vawng tlat ang u khai!



KTP INCHHIARNA

A hnuaia mi hi January 2013-a KTP inchhiarna thar ber a ni.

Bial, Branch, Member	Mizoram chung	Mizoram pawn	Total
Bial awm zat	169	8	177
Branch awm zat	748	45	793
Member mipa zat	81717	977	82694
Member hmeichhe zat	47736	655	48391
MEMBER TOTAL	129453	1632	131085

2013 KṬP ROREL INKHAWM THLIRLETNA

— Lalrotluanga, Lunglei Chanmari

Rum 2013 KṬP Rorel Inkhawm March 1-3, 2013 chhunga neih chu ṭum dang ang lo takin Aizawl khawpui pawnah nghah a ni a. Rorel Inkhawm Aizawl khawpui pawna nghah vaw khatna a nih vang nge ṭum dang aiin rorel palai an kal ṭha a, a thlengtū lam pawh an ṭang hle a ni tih an inbuatsaih danah a hriat a, Rorel inkhawm hi Aizawl khawpui pawn General Conference thlen zuam lo deuh si te hian thleng ta zel mai se a ṭha ang a, tih ngaihtuahnaah a riaklut nghal a ni.

Tun ṭum Rorel inkhawm hi Lunglei Chanmari leh Venglai Pastor bial Lunglei Khawpui hmar lam leh chhim lam kawtchhuah dap thleng thak khawp a Branch nei inkarkik tak tak a awm ṭang kawp ten an thleng a, Rorel inkhawm an thlen hma lawk hian Venglai bial aṭanga indang thar Bazar Bial a piang baw a, bial pathum in an thleng pawh ti ila a sual awm lo e. Hei vang hian Rorel

inkhawm kan neih chhung zawng hian Palai te phur tur Bus pahni an tlan kual tir reng a ni. Bial pahni OB kalkhawm ten Organising Committee an din a, Organising Committee hian Sub-Committee peng sawmpakhat an din a, Rs. 6,05,000/- budget-ah an insiam a ni. Bial pathumah hian belhkhawm in KṬP member 900 chuang awrh an awm a, Organising Committee hian iptepui ak meuha hna an thawh chhung hi kum chanve vel niin an sawi a, hetiang chhung lek a hetiang zat lek member in, Budget an ruahman aia tam daih sum an hmu thei hian an thawkrimin an thawhhona a ṭha a ni tih a ti lang hle a ni. Tin an nghahna Kohhran Lunglei Chanmari hi chhim lama Presbyterian in hnuhma kan neihna tur atan a bul ṭantu an ni baw a, chhim lam tan nu leh pa nih an tlin hle tih an inbuatsaihna hian a ti lang awm e. Tui hnianghnar taka kan awm theih nan tuizem lian 60000ltrs dawng an siam thar

a, kawlphehtha lam intodelh lohna rama cheng kan nih avangin Kirloskar Generator lian Rs. 400000/- man chuang an lei thar a, hmeichhia leh mipa inthiarna nuam tak tam tham tak an siam thar mai bakah an Biak In chhak lungbang thui leh sang tak maiin an rem thar vuk baw a, Sande Sikul Hall chung pawh mipui thut rem turin RCC in an slap zawl zan baw a, heta tan hian Rs.1300000/- chuang an seng a, tin Biak In kawtah an mahni kutchhuak ngei maiin Rs.300000/- chhuang sengin Organising Committee-te sum sen ngai miah lo in Pandal thianghlim leh mawi tak mai chungthuah (Cieling) nei an sa baw a ni.

Khualchhawntu (Reception) lamin Lunglei kawtchhuah ațangin palai kalte min lo chhawn țan a, thla an timuang hle. Kristian Țhalai chanchinbu hmuh hman loh avanga, pan hmasak tur hre lo hawihai lutuk tur pawh a ti ziaawm deuh, an thil chak rûk em em thleng an nih vang nge thlengtu țhalai chevel a zangkhai in hmuh a nuam a, țhutna kawhhuu (Usher)-te an mawiin an zei a, kan hmunhma tur an buatsaih rangin an senghawi

rang țhin hle a, an phur hmel em em vek mai kha hmuh a nuam zual. Ei leh in buaipuitu (Refreshment) lam pawhin min hrai rangin min hrai hneh hle a, puan vara lufun a hmabah var ha a kutkawr bun țhap chung a eitur min hlui țhin khan ei a ti chakawm zual. Kohhran hmeichhia leh Pavalai Bawlhhlawh thianfaitu (Sanitation) lam pawh an che rangin inthiarna lam pawh a thianghlimin a rimtui țha țhin khawp mai. Ruai buaipuitute pawhin an hneh hle a, inrinni tlai a Rorel palaite hmun thengthaw nuam tak mai leh rualrem tak a thutthlenga thu chung a zanriah min eitur kha puar a dam hle, an beisei aia tlemin zanriah kan ei kha chuan senghawi tur a ti tam deuh ngei ang.

Maicham leh Pulpit zah khunkhan taka Pathian Biak Ina Pathian be țhin Presbyterian kan ni tih ti lang tura in pawlkhawmna (Fellowship) na hmun Biak In ațanga hla si lo, Ar chilchhak phakna leka an siam khan in pawlkhawmna lama țhalai chevel a ti zangkhai hle a ni.

Kan chungah ni leh thla ngawt lo chu leng dang reng reng a awm lo ti niawma

mawi Rawngbawl tura chhandam thalai za tamtak maiin KṯP member-te khawharna hmun a, lam kan han thai mup mup mai khan khawhar a hnemin KṯP nih a tinuam zual hian ka'n ring khawp a. Hei hian kan Central KṯP hruaitute changrel a sual ngai loh zia a tilang hle a ni. Rorel inkhawma Central KṯP hruaitute hawiher leh chevel amawiin a zahawm hle a. Speaker dang rawih ngai miah loa kan hruaituten Pathian thuchah ropui tak tak an sawi thin khan hruaitute hi Pathian ruat anni tih a tilang Chiang hle a ni. Member tam takin an zai mit ngei a hmaihma a kan hmuh ngai zen zen loh Synod Zaipawl ten Rau ropui tak maia Pathian fak hla inkhawm apianga an rem hmu a kan ngaithla thin khan chawlhna tui kamah min hruaiin dam ati manhla a, an zaimawi phen a an thawhrim turzia min hriatchian tir hle a ni. Tin Zoram khawvel a Pathian fakna hla sa thin milar tak tak lengi leh vala te zai rimawi fawn vel khan lei piahlam ramah thlifim min dawn tir mai bakah KAN PAWL an lo ni ve reng khan KṯP nih ati chhuanawm zual. Thlarau thianghlimin iptepui ban nan min hmang a ni tih ti lang tura

mipui zai boruak anuam em em mai khan kan Rorel inkhawm ati nuam zual a, nula leh tlangval khati zat teh meuh maiin an nulatna leh tlangvalna dah thaa siamtu faka lamtual a ban an phar hmuh khan, Zoram sualna in pathian thinurna tawngbaw mai tura tlangau thin te thupuan min awihloh zual tir, lamtual zim lutuk vanga taksachetna chang thenkhatt e an phu euh euh chauh thei khan boruak asan tur angin a ti sang lo deuh em aw ka ti. Tun tumah hian *"Chutichuan remchang hun kan neihzia ang zelin mi zawng zawng chungah thil tha i ti ang u, rinna chhungte zinga mi chungah i ti deuh ber ang u"* tih Tirhkoh Paula'n a lo sawi kan zawm tlang hle a ahriatna chu thlengtu tanpuina hi Rs.70000/- chuang a tlingkhawm a ni. Bial leh Branch hruaitu nachang hre tak tak kan lo awm hi a thlamuanthlak thin teh e. Rorel inkhawm a hun lai taka kan hlimthla chevel mahni in chhung lum atanga en theih tura min chhawp chhuah sak tu Synfo a thawktute an fakawm rualin helama hmala hmasa leh angaihna hria Kohhran hruaitu nei kan lo ni leh zel te hian Presbyterian nih a tinuam zual.

Inrinni chawhma chauh Rorel nan hun kan nei a chawhnu lamah Saikuti Hallah Fakna inkhawm neih tura ruahmanna kan siam baw si khan kan rorel tur ang ang te tha takin relthlu mah ila Rorel ti ngaihnawm turin tawngkam tuitam theih a ni lo kha a kalh a kim lo deuh em aw a tih theih rual in, Chawhnu lama Saikuti Hallah kan Fakna inkhawm hun hman kha KṛP mai ni lo a khaw mipui ten kan hlut viau mai baw si hmuh kha chuan ngaihdan mumal tak pawh min neihtir ta meuh lo a. Tin kan hruaitute leh Zaipawl leh mal zai lama mi lar te, thingpui in na hun pawh nei hman mang lo khawpa thla kan lakpui thin kha a lawmawm em em rualin midang tana harsatna kan siam palh thei ang em tih hriat tel a tha khawp mai. Keini lamah hi chuan Presbytery leh Bial inkhawmpuia te hian Pathianni chhun leh zan bakah thawhlawm kan khawn ngai loh vang nge Rorel inkhawm chhunga tan zan tih loh inkhawm apianga thawhlawm kan khawn thin

kha a Presbyterian lo riau in ka lo hre ve ringawt a. Ka hriatchian taw loh vang pawh a ni mai thei. A tawp zana Upa Zonunmawia, General Secretary, Central KṛP-in *"Tun tuma kan Rorel inkhawm hmanah hian fel kan tih taw loh leh tha kan tih taw loh tamtak a awm ang tih a rinawma, chung zawng zawngah chuan ka mawhphurh vek a ni tih ka hria a, ka fel taw lohna avangin ngaihdan ka dil e"* tih thu a rawn sawi khan hruaitu nih a tlin in a va han thlamuanthlak tak em.

Pathian tana mi inphal, thawkrim, thahnemngai, leh tawngtami te, tawngtaina avanga Pathian awmpuina leh kaihhraina, venhimna leh chenchilhna changa Boruak nuam tak hnuaia Rorel inkhawm tluang tak mai a kan zo thei kha a lawmawm hle a, KṛP hi Pathian ramzauna atana rawngbawl na pawimawh tak a nih zia hrechiang thalai rual tamtak kan la awm chung hi chuan Zoram hian Lalpa malsawm ram rim a nam reng dawn tih i hre thar teh ang u♦



■ *Mi tam tak, an hlawhtlin theih loh tur chhan kawng tam tak sawi tur hria an awm. Chung miten an mamawh ber chu an hlawhtlin theih dan kawng khat chauh pawh sawi tur an hriat hi.*

— Willis Whitney

MEDIA HMANGA THALAITE RAWNGBAWLNA

— Vanneihluanga

MEDIA HI ENG NGE NI ?

Media awmzia : Media tih thumal hian awmzia a ngah a, kan thupuiin a tum chu Mass Media tihna a ni mah mah ang. A ruala mi tamtak, (ram pakhat emaw, hmun pakhat emawa a huhova chengte) hnena hriatna thlenna chungchang sawina hi Mass Media a ni. Kum 1920 vel atang khan, radio leh thuchhuahna chanchinbute hmanga a ruala mipui tamtak hnena vawilehkhata hriatna thu thlen theih a nih atangin, Mass Media tih thumal hian hriat a lo hlawh tan a ni. Chutianga hriatna thlenna hmanruate (Medium plural : Media) chu ni tin chanchinbu, magazine, cinema film, radio, television, Internet, billboard (signboard, banner etc), lehkhahu, CD, DVD, videocassette, computer games leh lehkhah-a chhuta chhuah (Publish) chi thuziakte hi an ni ber.

KTP hian media chungchang zirhona leh kaihhruaina engemaw zat a buatsaih tawh a, a hman pawh kan hman nasa ta reng a. A awmzia leh a tangkai dante inhrilh nawn fo ngai tawh lo awm tak kan ni. Chuvangin tun tumah hi chuan,

tangkai lehzuale kan hman zel theih nan, kan hman mek dan thlir pahin inven kan thluna laite kan tarlang tam mah tawh zawk dawn a ni. Media hi hmelma a ni lo tih leh, a hmanngu leh a dawngtu a zirin sual leh tha a innih chhawk thei a ni tih pawh kan hre tawh awm e. Chuvangin, thinlung thianghlina KTP ten kan hman phawt chuan, inpuanchhuahna mai ni lovin, ral dona leh ram lakna hmanraw tangkai taka ni tih hi kan inzirtir dan tur a ni.

Kan hmannate :

1. **Zai leh Rimawi :** KTP ten kan hmanna langsar tak mai chu zai leh rimawiah a ni. Tunlaiin track rimawi ringa zai kan uar ta hle. A thatna leh remchanna chu kan hre tawh a. Uar lutuk vanga thil pawh a awm theite sawi zawk ila. Rimawi tum hi thalai nawlpuite inhmanna tur a nih laiin, tunah chuan, track rimawi kan uar tak avangin, rimawi tum hi studio chhunga eizawngtu (professional) mi tlemte kutah kan hlan a, a nawlpui chuan awrawl (vocal) chiah kan chhuah ta a ang hle a ni. Hetiang zela kan kal chuan, drums vaw thiam chu sawi loh, tingtang perh thiam thlengin kan tlem tial tial ang a, rimawi tum leh chawhpawlh hna hi keyboard tum thiamte kutah kan hlan zel ang a, thalaite inhmanna a tlem tial tial mai ang tih a hlauhawm ta hle. Chuvangin, a lo hautak deuh a nih pawhin, kan tih theih hrâm chuan, track music ngawt ring lova, a taka rimawi

hmanraw hrang hrang hmanga zai uar thar leh ila, hmasawwna a nih zawk a rinawm. Tin, zaithiam mimal leh zaipawlte track music hmanlai inhawhsak kan ching a. Rawngbawlna huang khata mite kan nih chuan phal loh a mawi si lo va, mahse thil tih awm loh tak a ni. Eng nen nge kan tehkhin ang? Thuziak mite hnenah hian, "I hawrawp ka lo hawh!" ti ta ila, thil tih awm loh tak a ni ang. Chutiang chu a ni thuak awm e. Thinlunga thil mawi phawrhchhuah (creative works) hi a neitu ta a ni a, hawh chi a ni vak lo. Zaipawl zai danah te, a vai danah te, uniform leh kalphung tamtak hian, mahni tihphung ngaia kal ngam hi hmasawn lohna entirna a ni lem lo. Inentawn hi hmasawwna rahbi a nih rualin mahni inrin tawh lohna lantirna a ni thei. A hma chuan ngil taka dingin zaipawl an zai a, tuten emaw ban vai an han ching a, kan ching leh vek a, tuin emaw solfa vai dan dang deuh a han ching a, tihdan tur emaw kan ti leh vek a. Tuin emaw zaipawl karah solo a han zep a, kan entawn leh sup sup a, sawi sen a ni lo. Heti reng reng chuan hla un (classic) leh tunlai (contemporary) music zeizia pawh hre hrang lovin thangthar hi kan chhuah thei dawn a ni. Zaipawla zai lamah chuan, mihring tam lam atangin teh ta ila, Mizoram tluka zaipawla inhmang kan tamna ram hi khawvelah a awm lo hial ang. Chuvangin, khawthlang ram tihdan apiang entawn zel pawh hi

kan tihtur niin a lang lem lo. Thil thenkhatah chuan, kan tihdan hi 'tihdan' a ni ve tawh mai.

2. **Chanchinbu chhuah** : Hei pawh hi a thatzia inhrilh a tul tawh lem lo. Kan intihhmuh hi a tha. Mahse, zangkhai leh hlimawm kan zawn lutukna lamah thutak pai manglo khawpin Branch thenkhat chuan kan chanchinbu hi kan chantir ta fo mai. Kohhran leh YMA-in a lo chhuah ve tho baw si a, KTP chhuah nen, chawlhni zing-ah mipui sum tihek zawngin thu inang kan chhuah tlang thup thup mai a nih pheii chuan, a hautak thlawn dawn a ni. Hlimawm, thianghlim, bengvarthlak leh thalaite kaihhraina tha kan chhuah em tih hi kan inennawn fo a tul a ni. Chanchinbu hian kalphung a nei a, hriat a that rualin, zawm famkim tum leh lutuk hian a chhuahtute a aikhirh tlat thei baw. Bulletin buatsaitute hi KTP tuifima chiah zawr hnep ni ngei se a tha. Editor chu Kohhran leh veng hmangaih mi, rilru zau leh thianghlim, Kohhran leh KTP thu haw lam leh kal lam hre phak zinga mi a ni ngei tur a ni. Hemi rual hian, KTP zawng zawngte chanchinbu *Kristian Thalai* tihchangtlun leh chawisan hi KTP mamberte mawhphurhna langsar tak a ni tih inhrilh nawn leh hi a tul ta hle baw. Mahni chanchinbu chhuah bakah, nitin chanchinbu leh thuziak dangah duh aiin kan la inrawlh tlem. Thalaite hian

zahawm takin ngaihdan kan thawh tlem a, letter to editor te pawh kan ziaak tlem hle. Mahni hming tarlang ngam lova SMS leh hminglem hmanga thu hriam tak tak chhuah chin hi Kristian ngaihtuahna atangin a him em? Ram a siamtha tak tak ang em tih hi ngaihtuah tham a ni. Saptawng chanchinbuah te hian, Mizoram leh kan kristianna sawiselna lam thil a chhuak chamchi a, lekhathiam heti zat kan awm tawh hnuah pawh kan chhang let mang hlek lo. Kan chîm chin hi a la zim hle a ni. Mi ziahsa chhiara thuthmuna lo sawisel ringawt tur kan ni tawh lo. A nâka zena, chanchinbu te pawh luhchilha 'pawlh thianghlim' turin thangtharte lo chu nghah chhuah tur anawm chuang lo. Mawhah kan laka ngai.

3. **Lemchan :** Dawhsanah leh TV-ah thalaite lemchan kan thlir thin. Dawhsana chan tur leh TV-a chan tur hi a thawnthu inang a nih pawhin, thil inang lo tak a nih avangin a hrang daiha a thu (script) atanga buatsaih thar a ngai tih hriat tur. A script buatsaih dan a zirin dawhsana hmuhnaawm hi TV-ah a hmuhnaawm lo thei a, TV-a hmuhnaawm hi dawhsanah tihngaihna a awm miah lo thei baw. Director tih tur, hlutna, mawhphurhna leh zahawmna kan la hre taw lo hle baw. Tunlaiin, lem kan chanin mipui tihnuh ringawt hi KTP te hian kan thiltum emaw kan ti ta a ang hle mai. Lantir tum thûk leh nghet tak kan nei a, a

hmanruaah mipui kan tihlim a ni zawk. Chaw aiin chawhmeh lamah kan buai lutuk ta niin kei chuan ka hria. Track music lo chhuah hnu hian, mipui hmaa thiam thil lantirna (performing arts) hi kan tiduhdah lehzuat ta a ang hle mai. Economy mila awlsamna kan zawna lamah changtlunna lam pan lovin thatchhiatna lam kan hawi a ang ta hle a ni. Hamlet te, Genevieve te, Pangpar Bawm te kan lo hmu tawh a, a hunlaia changtute let tamtakin thil a awlsam tawh zawka. Chuti chung pawhin, khatih laia dawhsana kan lemchan tha neihte kan tluk phak ta tlat lo hi a paw hle a ni. Inpekna kan tlachham a ang hle. Heti khawpa rimawi lama kan inhman nasat lai leh, track music siam kan awlsam hle laiin, musical play kan chhuah tam thei lo hi a tlawm thlak hle baw.

4. **Thil dang :** Zai leh rimawi kan intihhmuh a, rawngbawlnaah pawh kan hmang nasa hle. Mahse, thalaite inhmannna tur dang debate, symposium leh extempore kan tih ang chite hi duh aiin kan hmang tlem. Thalaite hlutzawng tak pakhat chu quiz hi a ni. Hengah hian hmasawna tur kan la ngah hle a ni. Talk show kan ching thar a, hei hi TV tawngkam a ni a, a that rualin a hun leh hmun a awm ngei ang. Hmun thenkhatah Worship Dance tih lampang kan hmu thin a. A theih hram chuan, Mizo rimawi leh hla ngei hman ni thei se a duhawm ngawt mai.

INENFIAH TA ILA

Kan han tarlan tak thil hrang hrang aṭang khan, ṭhalaite hian inenfiahna tur thil ṭhenkhat kan nei ngei ang. A tlangpui i han en leh thuak thuak teh ang:

1. **Hun leh hmun :** Media hmanraw hmanga rawngbawl na eng pawh hi, a chhia tih theih a ni lo va, a ṭha tih theih pawh a ni lo. A hun leh hmun a zir a ni. Khawpui nun leh khawpui pawn lam nun mil te a awm ang bawkin Biakin chhung leh pawn mil pawh a awm. Rawng kan bawlsakte tuina, thiam zawng, tlin tawh leh ngaihven zawng thil a nih loh chuan barh luih chi a ni vak lo. KṭP ten hun ren kan zir a ngai. Hlimin tui mah ila, kohhran inkhawm pangngai aia KṭP inkhawm a rei fo mai pawh hi a dik chiah lo. Thu engpawh sawi duh kan neih chuan, ngaihnaawm taka minute nga chhunga sawi kim vek theih te hi kan zir a ngai. Media khawvela thil hlauhawm em em mai chu NINAWM nih hi a ni.

2. **Inhuam a ngai :** Kan ti ve tingtang a, senso, inhuamna, tih tak takna leh tei rei peihna-ah hian kan tlin lo fo. Film siam pawh kan thiam lo a ni lo. Video kan edit-in, second riat lo lang zeuh tur hi tlaivarpui a ṭul chang a awm fo. Chutiang inhuamna tak tak chu KṭP te hian kan tlakchham chuan

Media pechhuaktu ni lovin mi pekchhuah lo dawngtu kan ni zel ang. Kutthlak hmam uluk taka ruahman lawk tur a ni. Kan mil tawh hria ila, chumi milin kut kan thlak chauh tur a ni.

3. **Kan tlin tawh hriat :** ṭhenkhat chu kan ngaihtuahna a sâng em em a. Kan culture leh economy-in a tlin tawh ngaihtuah miah lovin, media thil ropui tak tih kan tum ṭhin. Lâkluh nei mang si lova inchei nalh zahthlakzia kan sawi ang chiah hi a ni. A tawpawh kan lehkhahu, cassette leh CD te lei turin kan inhnawn leh vak vak ṭhin. Kein in tlin mah ila, kan rawngbawlsakten an tlin lo fo. Mimala kan tlin hi a huhova tlin loh theih a ni bawh. Hautak loh hi a him ber mai.

4. **Culture humhalh :** Culture humhalh hi tute emaw tih tur bika dah chi a ni lo. KṭP te hi media hmanga kan hnawm ze hlutna tichingpentu hmanraw lian takah puhin kan awm mek a ni. Kan zai leh lam te, inkhawm kaihhrui kan duh dan leh rawngbawh kan tum dan tantak hi hnawm ze tihawm zawng ni lova, tidal zawng rawngbawh a nih chuan a dik lo vang. Culture leh sakhuah hi lâk hnan hleih theih loh khawpa inkungkaihnghet a ni. Culture kan hmuhsit chuan mahni sakhuah leh nihna kan hmuhsit tihna tluk a ni.

LUNG A LENG LAWK MANG E

— C.V.L. Chhanhima
Chanmari Branch

“KTP ka Over tirh chu a hrehawm thlawt e, awmdan pawh ka thiam lo a ni ber mai. Hunbi pangai angin thawhtan zan a lo herchhuak a. Chutah thalai inkhawm dar a lo ri vang vang mai chu! Rilruin chak viau mah sela, kum lamin min umchhuah tak miau siah chuan, tel ve chhunzawm zel a inthlahrun awm ta si nen, thiante inkhawm kal tur chu awt em em chungin khawhar leh lungleng tak chuan ka thlir zui vawng vawng thin. Tum khat phei chu ngaituah lawk hauh lovin inkhawm turin ka lo insiam leh hman pek chu niin ka fanuin, ‘ka pa chu KTP i over tawh sia inkhawm i tumleh bawk sia,’ ti lo phei sela chuan, ka kalleh hman ngei ang maw le,” tih thu KTP-a mi hrat khawkheng, a rawlthar chhuah hlim phat atanga a over thak thlenga thalai rawngbawlnaa inhman ral thak ti teh ang; a thim avar tlu lo leh a sur a sa hnuaiah a kul a tia lo che thin, tuna Kohhran Upa tha tak lo ni ta tawngkam ka hriat hian ka

ngaihtuahna a luah khat hneh hle maia. Tun thleng pawh hian ka theihngihl thei tawh lo a nih tak hi.

Engvangin nge, chuti tak maia KTP-a tel nuam a tih em em a, a ngaihhlut em em nachhan ni ta ang le? Eng dang vang a lo ni lo, a chhan a tha em atin a ni. KTP chu a hmingah reng pawh Kristian Thalai Pawl a nih ang ngein, Kristan amah ringtu leh zuitute inpawl khawmna tura a thisen hmanga a din; Kohhran ropui tak mai chhunga a thalai rual te thukhat vuaa intel khawmna hmun a ni satliah mai lova. Rilru leh thahnemngai tak chung a rawngbawl hnathawk chhunzawm sak zel tura a ruat tak; Krista aia Palai niin, waviin thlenga a chenchilh leh a malsawmna dawng pawl ropui leh hlu tak a nih tlat vang a ni.

Chutiang zelin, KTP chu hmelchhia te tan hmelthatna thuruk; nun bawraw leh mi sual ber ber te pawh mi tha leh chhuanawm tak ni thei tura chher puitlingtu a ni a. Tin, khawvel thila dinhmun sang lo emaw, lehkhathiam lo leh challang lo, mi mawltê pawh ni sela, mi zahawm taka siamtu a ni lehzele. Chu mai a la ni lo fo, hmelhriat leh thian tha tak tak petu a ni bawk. Heng zawng zawng khaikhawm nan KTP

rawngbawl na peng hrang hrangah thahnemngai leh rilru zawng zawnga tel thin mi chu khawihmunah mah a zahpuiawm ngai lo va. Nupui fanau, chhungkua enkawl na kawngah a ngaihtuah awm hek lo. Sawihmaih phal chi ni reng reng lo chu - eng pawl pawh kaihruai thei tura mi puitling leh rintlak a nihna mawlh hi a ni. Chuvangin, he pawl hlutzia hre chiangtute chuan an ning thei lova, engtiklai mahin an inchhir ngai hek lo a ni. I sawi uar mah lo maw min ti a nia nge, a nihna tak ka la phawk chhuak zo lo zawk a sin. Ngun takin ngaihtuah ve mah teh Pathianin KṯP a hmanzia leh a awmpui tlat a nihzia tilang chiang em em tu chu - hman a ta tawh wawiin thlenga Kohhran hruaitu leh enkawltu tura a ruat Upa emaw, Pastor emaw, Evangelist a ni emaw, rawngbawl na peng hrang hrang leh pawimawh tak tak chelh thin tute hi an hunlai chuan KṯP-atihl thin tu mi hrat khawkheng an ni zel a ni tih i hre thei ngei ang le.

Chuvang chuan a lawm, kei ve teh lul hmanni lawk atanga rawngbawl ve tan chauh; chuti chung pawha thahnemngai lo leh thawh hlawk lo tak, humsualdaia tlu reng thin, mi tamkai lo tak pawh hian KṯP hi ka Idol a tana ka puan tlat ni.

Ka zep lo mai ang e, dik tak chuan he pawl nuam leh hlu tak kaltlang hian mumangah pawh ka la mang hauh lo leh ka beisei phak ngai hauh loh malsawmna tam taka vur ka ni a. Tun dinhmun ropui leh hlu min thlen a ni tih ka hre chiang hle mai. Ka awm anga min pawma, he pawl ropui tak maiah tel ve tlaka min ruat avang hian faktlak Pathian hnenah pawh lawmthu ka sawi nghal bawka ni. Ka dam chhung tawitêa ka nun, ka theihna sang ber leh tha ber hi ka hlan nawn mawlh mawlh fo vang.

Pathian khawngaihna a zarah kum sawmli ral kaia, KṯP over hma chuan dam turah han inbeisei ve phawt ta ila, engtik niah emaw chuan tuna kan hruaitu tha tak leh uihawm tak tak ten hreh tak chung a KṯP an chhuahtsan ta ang hian, kei ngei pawh hian ka tihve a la ngai ngei awm si a. Aw! Ava huphurh awm lawk teh lul em.!. Tunah te hian ka rawngbawl na tling lo tak leh beitham tak, a nuam leh hrehawm, a hahthlak leh hlimawm ka lo tawn ve tak tlemtê te kha mitthlaah a rawn lang nghal zut zut mai. Lung a va leng lawk teh lul em! Theih ni sela, kohkir leha; rawlthar chhuaht hlim kum 14 hmang tan nih te ava chakawm em.

Aw! KṯP ka nun khaidingtu vul reng ang che ♦



HRINGLANG TLÁNG

Ṭumkhat chu nausen hi a lo piang dawn a. Pathian hnenah, “Lalpa, ka pian hun a hnai tawh si a; mahse khawvelah ka la piang ngai si lo va, engtin nge ka awm zui tak ang le? Min duattu leh ṭanpuitu tur pawh ka nei dawn em ni?” tiin mangang takin a zawt a.

Pathian chuan, “E, lungngai reng reng suh. Ka angel tam tak zingah nangmah enkawltu tur bik angel pakhat ka ruat diam tawh alawm. Ani chuan i piantirh aṭangin duat takin a kuta charwiin a pawm ang che a, hmangaih takin a enkawol dawn che a ni,” tiin nausen chu a lo chhang a. Nausen tê chu a lawm avangin a nui hek hek a, “Lalpa, van ramah hi chuan nuih leh ka thiam tawh têa zai hi ka theih tawh a ni a; leiah chuan tuin nge min nuihpuiin, min zaipui ta ang?” tiin a zawt leh a.

Pathian chuan, “Nangmah enkawol tura ka ruat angel chuan a nuihpui ṭhin ang che a, hlim takin a zaipui ṭhin dawn che alawm,” tiin a lo chhang leh a. Nausen chu a hma ang bawka ngaihtlak nuam khan a nui leh hek hek a; mahse a hlim hmel chu lungngai hmelin a rawn thlak thut a. Pathian hmaah a bawokak phei a, a khup tawn tawn vuan chungin, “Lalpa, leia miten min biakin engtin nge ka chhan tak ang, an ṭawng ka hrethiam dawn si lo va?” a ti leh a, a lungngai takzet tih a hriat theih.

Pathian chuan nausen kut chu dim tēin a lo vuan a, a kai ding a. Nausen hnenah chuan “Nangmah enkawol tura angel ka ruat chuan i hriat tawh azawnga ṭawngkam maw ber berin a be ṭhin dawn che alawm. Dawhthei takin an ṭawng pawh a zirtîr bawh dawn che a ni,” a ti leh a.

Nausen tê chuan Pathian chu a hmai bul chetah a va hnaih a, “A nih Lalpa, nangmah hi rawn be duh ta che ila, engtin nge ka tih ang?” a ti leh ta a. Lalpa chuan nausen chu duat takin a lo pawm a, a hnenah chuan “Nangmah enkawoltu angel chuan i kut pahnih insiktîrin keimah min biak dan a zirtîr ṭhin dawn che alawm,” tiin a lo chhang leh a.

Nausen hmelah chuan zâmnâ leh manganna a lo lang leh a. Thlaphan hmel tak hian, “Lalpa, leia cheng mihringte chu mi sual tak niin an sawi si a, kei nausen chak lo leh mahni inawng thei lo hi tuin nge min hum ta ang?” a ti a, a thlaphang chu a thaw rang nghal sak sak a.

Pathian chuan nausen chu duat takin a kuah a, “Nangmah enkawltu angel chuan a nunna tlukin a ngaih pawimawh dawn che avangin eng

lai mahin a theihngihl ngai dawn lo che a; chuwangin a nunna hial thâpin i tan a bei thin dawn a ni," a ti a, chawplehchilhin nausen hmelah chuan thlamuanna a rawn inlar nghal a. Nausen tê bawk chuan, "Lalpa, kan inhmuh leh har awm si a, ka khua a va har dawn ve aw!" a ti leh ta reuh va.

Pathian chuan nausen chu a malah a thutîr a, a beng bulah a kun hniam a, "Nangmah enkawltu angel chuan he hmuna i lo kal leh theih nan thahnemngai leh uluk takin ka chanchin a hrilh thin ang che a, kei paroh i kiangah ka awm reng dawn alawm," a ti sep sep a. Van ram chu a reh ruai a, nausen chuan leiah a kal a hun tak tak ta tih a hria. A tawp nan hmanhmaroh takin zawhna a zawt leh a. "Lalpa, leia ka kal hmain keimah min enkawltura i ruat angel hming chu min hrilh theih ang em?" tiin a zawt leh ta a.

Pathian chuan nausen chu a en vung vung a, "Angel chu a hming a pawimaroh ber lo ve. 'Ka nu' tiin i ko thin dawn nia," a ti ta a.



Synod Bookroom lehkhabu thar thenkhatte

1. **Sam 42-72:** Kumin 2013 Puitling Sunday School ziribu puitu tha tak ni thei tur, kan mithiam Rev. Zairema buatsaih chu a lo chhuak ta. Ziribu tih lovah chuan Mizo tawnga Sam hrilhfiahna awmchhun a ni e. Aman Rs 150/-

2. **Chicken Soup For the Soul Bel 2-na:** Chicken Soup for the Soul chhuak hmasa, a bu hmuh tur awm tawh lo te kha chhut nawn chhoh a ni a. He chicken Soup Bel 2-na hi thawnthu ngaihnawm tak tak, nun tidanglam thei, rohlu lawrkhawm, mahni nun inenlet nan leh nun thar min pe thei lehkhabu a niin hmangaihna, huaisenna leh ngilneihna te nei tura min zirtir thei lehkhabu a ni. Dr. Rualthankhuma lehlin, Rs. 180/- man.

3. **Hlau suh :** Tunlaiin Mizote zingah Hlahna, manganna, thawpikna, chiaina leh Depression vanga buai kan tam ve ta hle, intihlum hial pawh kan awm ve mek ta. Chutihlaiin hetiangin a tlakbuakte tana kawng dik kawhhmuh thei lehkhabu tha erawh kan tlachham hle. Chu kan tlachhamna puhru thei lehkhabu chu H. Rotluanga thahnemngaihna avangin peih fel a ni ta. Lehkhabu bakah a tak hmuh theih turin CD a chhawm tel nghe nghe. A man Rs. 200/-

4. **Body Language :** Kan ngaihdan, duhzawng leh duh loh zawng, kan mizia leh ngaihtuahna hi thup tum teh mai ila kan zaizirah te, kan taksa lekkawh danah te, hmelah te, kal danah leh awmdanah te a lo inlar chhuak tho thin. Chutiang awmdan hrang hrang leh mizia inzawm dan leh inlaichin dan hriatzauna bu, MS. Ralte lehlin hi mihring mizia man chak tumte dan chhiar ngei chi a ni e. A man Rs. 100/-

5. **Consumer Right leh keimah :** Mizo mipuite hian sum sen leh chumi avanga service dawn a lungawithlak leh thlak loh hi kan ngaihtuah peih lo tlangpui. Lungawilohna kan neih pawhin kan phun lungawi mai thin. Consumer Forum-a Chairman Lallunghnema'n Consumer right chungchang min hrilhhriatna, zawhna min chhansakna leh a thil tawn hrang hrang a khungkawhna hi hnam anga min tibengvar thei lehkhabu a ni e. A man Rs. 100/-

6. **Thinlung Luangliam :** Mizo Literature a hausa zel a, hnam changkangte chauh neih phaka kan ngaih Poetry hlang awmna lehkhabu hial kan nei ta. Zo-Verse, Zo-Stanza, Zo-Sonnet, Zo-Rimawi, Hrawvan Verse, Laltheri Stanza, Awithangpa Stanza leh Hrangchhawni Stanza ngat hmanga F. Lalzuithanga thinlung luangliam hi lo luanliampui ve rawh le. A man Rs. 70/- a ni.

■ ■ ■ RIMAWI

ELEMENTS OF MUSIC LEH KOHHRAN ZAIPAWL

— Lalsiamkima
Lecturer i/c Music, ATC

Music hi ri, awmze nei leh kawnghmang nei tak a ri, hun bi dik tak a lo ri, thil thleng leh awm dan nen inchawiha lo ri chhuak hi a ni. Ri tel lovin music a awm thei lo va, ri zawng zawng hi music a ni hek lo. Ri hi music a lo nih theih nan thil chi-4 (4 elements) a awm a ngai a, chungte chu - Pitch, Rhythm, Dynamics leh Tone color te an ni.

Music chuan rik dan bi a nei a, a san zawng emaw a hniam zawng emaw chu dik tak a ri tur a ni. Chumi lam sawina chu Pitch a ni. Music chuan rik hunbi a nei baw k a, hunbi dik taka a rik loh chuan music a ni thei lo. Chumi sawina chu Rhythm emaw Duration a ni. Tin, music rik dan tur chu a hun leh hmun azirin a ringin a zawi tur a ni. A sawi chhuah tur mil zelin, a chang chuan ring em emin, a chang chuan zawi em emin a ri thin. Chu chu Dynamics emaw Intensity tih a ni.

Tone color chu ri reng reng, a mawina leh a ngaihno beina lam sawina a ni ve thung a. An thil puanchhuah tur mil zela ri, a changin thum tak emaw sin tak

emaw, a changin teng tak emaw, fiak tak emaw a ri hi a ni.

Ri reng rengin heng kan sawi tak chi-li (4 elements of music) te hi a ken tel loh chuan ri chu music a chhiar tel a rem lovang. Alan Blackwood chuan, "Music chu awmze nei taka ri siam chhuah (organized sound) a ni," a ti. Tin, Pu Lalromawia "Music Lamtluang" tih ah chuan hetiang hian a inziak: "Music chu thiam tak a ri cheimawi, a rik hunbi te, a thluk mawina te, a inchawih mawina te, a ri mawina hrim hrim te tangkawpa ngaihtuahna leh thinlung a khawih dan puanchhuahna hi a ni."

Aw le, Zaipawl zai hi music chu a ni ngei mai. Mizoram a kohhran zaipawl hrang hrangte hian heng Elements of music chi-4 te hi eng ang takin nge kan ngaih le? Tunlai kan zaipawl te zai ah hian solfa (pitch) dik taw k lo hriat tur a awm ta fo mai. Zaipawl conductor-te hian solfa dik thlapa zai hi kan ngai pawimawh taw k lo nge, a dik kan hre lo hrim hrim zaw k? Zaipawl zai hi music a kan chhiar tel dawn chuan a solfa (pitch) a dik thlap tur a ni. Hetiang chiah hian kan hla sak chu a hunbi dik takah a ri thin baw k tur a ni.

Zaipawl member tam tak hian zawite a zai hi kan harsat tlat nia! Chu mai bakah mipui tam zaw k hian zawite a zai hi kan ngaithei vak lo. A zai ring apiang hi thiam kan ti mai thin niin a lang. Amaherawhchu, hla reng reng a bul a tanga a tawp thlenga a rik dan

ngai renga a rik chuan generator ri chur chur nen danglamna a awm lo. Mahse, hla zawng zawng hi a changa zawitea ri a, a changa ring leh thin tur a ni vek tihna erawh a ni lo. Kan sawi tak ang khan a hun leh hmun azirin a ringin a zawi tur a ni. Music chu a thuchah ken mil zelin, a chang chuan ring em em emaw zawi em emin emaw a ri tur a ni. A thuchah kenin a mil chuan ring taka sak vek tur chi hla pawh a awm thei ang a, zawitea sak chhuah vek tur pawh a awm thei ang. Tin, a thuchah piah lamah a phuahtuten sak dan tur (dynamics) an ziahlan hi zui hram tum bawk tur a ni.

Entirna han pe ila. KHB no. 156 "Lalpa, thlipui a tleh chiam a" tih hla ah hian ring taka sak tur (f) laite, zawitea sak tur (p) laite, hriat hleih theihloh khawpa zawia sak tur (pp) laite, ring em em a sak tur (ff) laite leh, zawitea aṭanga sak rin tial tial tur (cresc.) laite a awm a. Tin, a thuchah ken han en hrim hrim hian thlipui tleh leh tuifawn nasa tak te, khawdur mup mup te a awm a, tin, chungte chu Isuan "bang rawh u" tiin a hau a, thuawih taka an lo reh tak huai thu te a awm a. Heng a thuchah ken mila he hla hi kan sak chuan music dik tak a lo ni thin.

KHB No. 232 kha kan en leh chuan chang 1-naah Isua chu thlan a a awm thu kan hmu a, lei hnuai/ puk chhung thim tak leh up churh a ni ngei ang. Chuvangin, zawi lam, thum deuh mum mum leh ri

kum leh thim (sap ṭawngin a fiah zawk ang: soft, warm & dark voice) lam deuha sak tur a ni ngei ang. A thunawnah erawh hi chuan Isua chu thlan ata a thawh chungchangte, a hmelma a hneh chungchang leh kumkhua a ro a rel tur thu kan hmu a. Chuvangin, ring leh uar tak, eng (bright) tak leh puak ṭhaka sak tur a ni ngei ang. Hei hi Tone color awmzia chu a ni ber mai. Music nih tling tur chuan hla reng reng hi hetiang hian, a thu ken azir zela kan awpek kan thunun hi a ngai a ni.

Tlangkawmna :

Heng elements of music kan sawi takte hi music-ah chuan a bulpui (basic/fundamental) a ni a. A bulpui hre si lovin a ler a lo kual vel mai mai hi thil awmthei a ni a, chuvangin, "let's go back to the basic" tiin zaipawl conductor-te leh member zawng zawngte ka han sawm che u a ni. Mipui fak hlawn kan duh vang maiin zaipawl quality kan tichhia a, Pathian min pek music hi diklo takin kan hman ang tih a hlauhawm. Hla reng reng hi Pathian thlarau pawlna aṭanga phuah a ni fo thin a, chuvangin mahni duh dan dan leh uluk lo taka, thiam chiang mang lova lo sak ve leh rikngawt thin hi a dik ber lovang. Music hi kan Pathian siam a ni a, A siamdan ang ngeia dik tak leh awmze neia hman chhuah hi kan tihtur pawimawh taka ni. Music tak tak ti ri chhuak turin ṭan I la thar ang u ♦

HRISELNA ■■■

TAKSA TANA ṬHALO TE LEH HRISELNA DAN



Taksa hriselna tichhetu hi tam tak an awm a. Hri kan lo vei a, kan damlo hi chu thu dangah dah ila. Keimahniiin kan ei leh in avanga natna lo awm ṭhin hi a pawihle a, chung lakah te chuan kan insum a ngai a ni. Chungte chu a tlangpuuin :-

1. **Meizial zuk** : Hei hian chuap mai a ti khawlo lo va, mit leh thisen zam thlengin a khawih pawih thei a ni.

2. **Sahdah leh tuibur** : Hengte hian pumpui a khawih chhia a, meizialte ang thovin ka/hrawk Cancer a kai chhuak thei a ni.

3. **Zu** : Zu hi a tawk chauha in loh chuan thin te, thisen zam te a khawih khawlo thei a ni.

4. **Ei luat** : Vawi khata thil ei ṭeuh hian kan pumpuiin a zo duh lo hle a, pumpui a ti khawlo thei a. Vawi khata ei ṭeuh ai chuan tlem deuha ei zin pawh a pawih lo zawk.

5. **Damdawi pangngai ei** : Damdawi hi pawngpaw ei mai mai loh tur, na chhawkn man tlawm chi leh Vitamin tih loh hi chu Doctor rawn lova ei loh a ṭha. Zan mut theih loh vanga muthilhtheihna te ei mai mai loh tur. I taksain rinrawla a neih

tawh chuan a tel lovin i muhil thei tawh lovang.

6. **Rilru hah** : Rilru hah hian taksain namen lovin a tuar ve a. Rilru hah mi tan chuan hlimna zawn hram tur. Inngaihtuah hah chawp leh inngaihtuah lungchhiat chawpte hi thil awm thei a ni tih hriat reng tur.

Hetianga anga taksa tana ṭha tur kan tih a, ṭha lo tur kan tih loh bawh chuan natna min tlakbuaktu tam tak kan pumpelh thei a ni. A awmzia takah chuan kan khawsak danin a zir loh avang hian mi tam tak chu kan hriselna hian a tawrh phah a ni.

Hriselna dan paruk : Taksa enkawl nana pawimawh leh hriselna atana ṭulte chu heng a hnuaia ziaak parukthe hian a khaikhawm :

1. Taksa hian ei leh in tur diktak a dawng tur a ni.

2. Taksa hian ni eng leh boruak ṭha a dawng hnem tur a ni.

3. Taksa hian a chhunga bawhlhlawhte a tlangfai reng tur a ni.

4. Vawt leh lumin a tihnat theih loh nan taksa hi ven ṭhat tur a ni.

5. Nitinin taksa hian insawizawi hun leh chawlh hun dik takin a nei tur a ni.

6. Tur leh natna hrika luh lohna turin ven ṭhat tur a ni.

(Source : Hriselna)



KANTU

Ramrikawn Br.

RAMRIKAWN BRANCH

Tanhril Pastor Bial Kohhran 6 zinga kohhran naupang ber Ramrikawon Kohhran hi kum 2004 khan Tuivamit Kohhran atangin a indang a. 14th January, 2004 khan Ramrikawon Branch KTP hi a ding tan a ni. Kumin hian member- Mipa - 45 leh Hmeichhia - 29 inziak lut in, an vaiin member 74 an awm meka, Branch Committee member 16 an awm a ni.

A tlangpuiin thawhtan zan inkhawm chawhrualin member 20 (27.03%) vel inkhawm thin ang an ni a. Branch tihchak nan Group 2 - Alpha leh Omega group-ah te an inthen a. Sub-committee pahnih (Evangelical Cell leh Programme sub-committee) te an din a ni. Tin kumin hian Kristian Thalai chanchinbu copy 20 an la mek bawk.

Kumina an Budget (Bial Budget telin) chu Rs.75,000/- a ni a. Sum tuak nan a remchang apiang an thawk thin a, chung zingah chuan Blanket suk leh Sangha zawrhte hi kumtina inhlawh nan an hman thin a ni. Member thahnem tak thawkchhuakin an hlim thin hle. Tin, Faith Promise, Group Budget leh thawhtan zan inkhawm thawhlawm te hi an sum hmuhna hnar pawimawh tak a ni.

Ramthar rawngbawlna lamah pawhtan an lain hma an sawn hle a, Missionary Pakhat an chawm meka, sum an hmanna hlawm lian deuhah chuan Missionary an chawmna hi a ni a. Tin, missionary chawmna pualin

Biak Inah a remchang apiang thawh/thlak theih turin Bawm an hung a ni.

Kohhran zaipawl neiin, an tang hle a. Kohhran programme pawimawhah leh zai tura ruat an nih chuan theihtawpin an inbuatsaih thin. Biak In hawnga innei an awmin Zaipawl neih hram an tum thin a ni. KTP member Biak In hawnga innei an awmin leh zirna a titha leh hlawhtlingte lawmpuina thuziak (Citation) an pe thin a. Tin, KTP member boral an awmin an ral thin bawk.

Central KTP-in kumpuan thupui leh thupui hrang hrang zir tura a buatsaihte zir thei zelin, KTP inkhawm zanaah leh Fellowship-na hunah te an zir thin a. Sawihonate pawh an tuipuiin an hlawkpui hle thin a ni. Tin, sound system tha an neih theih nan theihtawp chhuahin sum an tuaka, hma pawhan sawn chakhle. Chumi zarah chuan tunah hian sound system changtlung takan nei ve tazoh a ni.

Member an tlem deuh avangin member hlate hnuhhnai na kawngah Sport leh variety programme huaihawt ala hautak hle a. Amaherawhchu, a theih ang angin Sport an nei ve thin a ni. Tin, Sum tuaka an inhlawhnaah member hlate sawm khawmin leh hnuhhnaihna ni pah fawmin tangkai takin inhlawhna hun hi an hmang thin. Tin, kumtawpah Advance Krismas leh Carol service te an nei thin a. Member pawh an thahnem thin hle a, hlim takin hun an hmang thin a ni ♦

Keimahni



■ February 19-20, 2013 khan Khawlailung biala Piler Branch chuan Diamond Jubilee an lawm a, he hun hmanpui hian Pu Samuel Laldingliana leh Tv. R. Lalruatkima, Committee member-te an kal. Hruaitu kalte hian Feb. 19 (Zirtawp) zanah Tv. Ruatkiman thuchah sawiin a tuk Feb. 20 (Nilaini) Jubilee niah Pu Dingtean Souvenir tlangzarhin thusawina hun a hmang bawk.

■ February 23, 2013 (Inrinni) khan Airfield Vengthar Bial Leadership training Airfield Vengthar Kohhranah Tual Upa Dr. Samuel Vanlalhlanga, Asst. Leader leh Pu R. Lalhmingthanga Committee member ten a neihpui a, training-ah hian member 38 an tel a, banah zanriah kilhovin zan Kohhran inkhawmah hun pein Pu Samuelan Pathian thuchah a sawi bawk.

■ February 26, 2013 (Thawhlejni) zan khan KṮP Gen. Conference, Thenzawla neiha thurel bawhzuina kal zel - Work Ethics, Value System leh Mental Health inzirtirna film chu Rev. Lalrinmawia, Leader, CKṮP chuan Chanmari Kohhran Hall-ah a tlangzarh.

Film siam tur hian Central KṮP chuan kum 2010 CKṮP Film Competition-a Lawmman Pakhatna dawngtu Chanmari Branch KṮP a ngen a. Chanmari Branch hian chak taka hma lain film ṭha leh hmuhnaawm tak '*Chiahpuam Pari*'tiḥ chu an siam a, an chungah Central KṮP chuan lawmthu a sawi a ni.

■ March 1-4, 2013 chhung khan KṮP Rorel Inkhawm wawi 5-na Lunglei Chanmari Kohhran Biak Inah neih a ni. Palai rorel zawng zawng 809 an ni.

Central KṮP chuan Rorel Inkhawm wawi 5-na hi Lungleiah ngḥatin Lunglei Chanmari Bial leh Lunglei Venglai Bialte inthlenṭawm turin a ti a. Organising Committee-te remruatnain Lunglei Chanmari Kohhranah neih a ni ta a ni. Lunglei khawpui chhungah hian Presbyterian Kohhran Pastor Bial pahniḥ (Chanmari leh Venglai) awm ṭhin a ni a, nikum 2012 Synod khan Lunglei Bazar Bial hawng tharin Bial pathum (3) inthlenṭawm a ni ta a ni. Bial pathumah hian Kohhran 16 awmin Branch Church 2 a awm mek a, Kohhran member 4242, Dan zawhkim 2835 awmin KṮP member chu 1101 an awm mek a ni.

Palaite hi Chanmari Kohhran huam chhungah chauh thleng lovin khawpui chhung Kohhran/Veng hrang hrangah thlen darh a ni a, hei hian mikhual thlen pawh a ti zangkhai hle a ni. Rorel inkhawm thlengtute inbuatsaihna leh inpekna kawng engkimah a hlawhtlingin a lawmawm a, Rorel Inkhawm hlawhtling tak kan neih theih avang hian Pathian hnenah lawmthu i sawi ang u.

Rorel Inkhawma aṭanga kan hriat awm langarte :

1. Kum 2015-a KTP Rorel Inkhawm chu Biak In Pui, Mission Vengah February 27 - 3 March chhungin neih a ni ang.
2. Kum 2016 KTP General Conference chu March 3-6 chhungin Champhaiah neih a ni ang.
3. Kum 2013 chhunga Central KTP hmalaknaa Counselling training buatsaih.
4. Kan Kohhran thurin hrilhfhahna Branch tina zir tura Central KTP aṭanga hmalak.
5. Kum 2014-2015 KTP Kum puan atan 'Pathian tawh tura inpeih'
6. Kum 2013-2014 Budget :

2013-2014 CENTRAL KRISTIAN THALAI PAWL BUDGET KHAIKHAWMNA		
Sl.no	BUDGET HMUHNA	Budget
1	Kristian Thalai Pawl Synod Budget	1,293,000.00
2	Fellowship Budget	1,300,000.00
3	Youth Recreation Centre Budget	700,000.00
	Grand Total	3,293,000.00

- Note :**
1. Synod aṭanga kan budget hmuh tur hi Synod Inkhawmpui 2012 khan a lo pass tawh a ni.
 2. Fellowship budget hi Bial budget leh thildang aṭanga hmuh tur a ni.
 3. YRC Puala member mila kan thawhkhawm leh tur kha a ni.

■ March 8-10, 2013 chhung khan Kohhran Hmeichhe Inkhawmpui Lian wawi 45-na Republic Veng Field-ah nei a ni a, Central KTP aiawhin Tual Upa Zohmangaiha (Fin. Secy) leh Tual Upa Lalhruaizela (Com. Member) te an palai.

■ March ni 8-10, 2013 khan N.E. Khawdungsei Biala Chiahpui Branch KTP te chuan Branch Golden Jubilee ropui takin an lawm a, Central KTP aṭangin Tual Upa Lalremsiama leh Tv. R. Lalruatkima ten an hmanpui. Hruaitu kalte hian zirtawp zan leh Pathianni chawhnu inkhawmah thuchah an sawi a, Pathianni zan inkhawm ban fellowship-ah thuchah tawi an sawi bawh. Chiahpuiah hian thawhtanni chawhmaah sound system training an neihpui nghal bawh a. Chawhnu lamah N.E. Khawdungsei Branch-ah Sound System training hi rawn neihpui lehin zana N.E. Khawdungsei leh N.E. Khawdungsei Venghlun KTP inkhawmah thuchah an sawi leh bawh a, zan inkhawm ban hian an lo haw a ni.

■ March 8-10, 2013 chung vek khan Mizoram Presbyterian Church (Manipur Area) Central Kristian Khanglai Pawl Rorel Inkhawm wawi 2-na Mata Presbyterian Kohhrana neih hmanpuiin Central KTP hruaitu Tual Upa Dr. Samuel Vanlalhlanga (Asst. Leader) leh Dr. Lalliansanga (Com. Member) te an kal a, zaithiam Robert Lalduhzualan a tawiawm bawk.

■ March ni 11, 2013 (Thawhtanni) khan Sairang Bial KTP Leadership Training Sairang Kohhranah neih a ni a, Pu Saizamliaana Sailo leh Pu Samuel Laldingliana ten an hmanpui a. Training-ah hian mi 40 zet an tel a ni.

■ March 15 (Zirtawp) zan khan Bawngkawn Chhim Veng Branch KTP chuan KTP Kum Puan Film Insiamsiak-a lawmman pakhatna an lak chu Pathian hnena lawmthu sawina an Kohhran Hall-ah an nei. Upa Zonunmawia, Gen. Secretary, Pu Vanlalhruaia, Tv. R. Lalruatkima, Tv. R. Lalramnghaka, Committee member-te leh Synod Choir ten an hmanpui a ni.

Kum 2013-14 kum puan 'Midang tana malsawmna' behchhana film insiamsiak Central KTP buatsaihah hian heng a hnuaia tarlan atangte hian film hi a rawn lut a :-

Branch

Film hming

- | | |
|------------------------|---------------------------------|
| 1. Armed Veng South | - Diary |
| 2. Bawngkawn | - Thutiam |
| 3. Bawngkawn Chhimveng | - Guardian Angel |
| 4. Bethlehem | - Class of 2009 |
| 5. Champhai Vengthlang | - Malsawmna dawn thleng |
| 6. Chanmari West | - Nun hruaitu |
| 7. Chhinga Veng | - Kantu |
| 8. Chhinga Vengthlang | - Malsawmna thuruk |
| 9. College Veng | - Tho la, tawngtai rawh |
| 10. Dawrpui | - Lehlam atangin |
| 11. Durtlang | - Midang tana malsawmna |
| 12. Kanan | - Tunge kal ang? |
| 13. Khatla South | - Thamral lo malsawmna |
| 14. Kolasib Venglai | - Ka vengte |
| 15. Lallen | - Midang tana malsawmna |
| 16. Lunglei Chanmari | - Midang tana malsawmna |
| 17. Madanrtng | - Midang tana malsawmna |
| 18. Mission Vengthlang | - Tanpui ngai lo kan awm em ni? |
| 19. North Vanlaiphai | - Khawl bawm |
| 20. Ramhlun North | - Blocked |
| 21. Sihphir Venglai | - Midang tana malsawmna |
| 22. Tuikual | - Beiseina thar |
| 23. Zonuam | - Silver Kraws |

Lawmman pakhatna dawngtute hi Rs. 30,000/- leh frame certificate hlan an ni a. Top 5 te chu : Chhinga Veng, Dawrpui, Durtlang, Kanan, Lunglei Chanmari Branch-te niin Rs. 10,000/- leh Frame Certificate hlan an ni baw. A tel zawng zawngte hnenah frame certificate hlan a ni. Central KTP chuan film intihsiaa tel zawng zawng hnenah lawmthu a sawi a ni.

■ **Kristian Thalai Chanchinbu dinhmun (2012)**

Kristian Thalai lak belhhawm 33,638 Copies a ni a, 2012-ah member 1,28,116 kan ni a, member 3.80-in copy khat (1) inchhiar tawm ang kan ni.

Kristian Thalai Chanchinbu la thate :

1. **Kristian Thalai la tam Bial te**

(1) Venghlui Bial	: 822
(2) Khatla Bial	: 762
(3) Mission Veng Bial	: 667

2. **Za zela chhuta Kristian Thalai la tha Bial te :**

(1) Lawngtlai Bial	60.97 % (189copies)	310 Mem.
(2) Bungtlang 'S' Bial	59.07 % (140 copies)	237 Mem.
(3) Shillong Bial	57.14 % (132 copies)	231 Mem.

3. **A copy la tam Branch pathum (3)**

Branch	Lakzat
(1) Mission Veng Branch	- 488
(2) Mission Vengthlang Branch	- 432
(3) Electric Veng Branch	- 353

4. **Aizawl khawpui pawn Branch a tanga a copy la tam Branch pathum (3)**

Branch	Lakzat
(1) Kolasib Venglai Branch	- 204
(2) Champhai Vengthlang Branch	- 176
(3) Lawngtlai Bazar Branch	- 150

3. **Member a tanga chhuta a copy la tam Branch pathum (3)**

Branch	Member	Lakzat	%
(1) Lawngtlai Bazar Branch	149	150	100.67
(2) Thiltlang Branch	15	15	100
Pamchung Branch	35	35	100
(3) Phunchawng Branch	145	135	93.10

Kristian Thalai hi April thla hian copy 36500 kan chhu a, nikum lama lakzat phak lo Branch awm mahse kan punna hi a sang zel a, a lawmawm hle a ni. Tan la zel ang u.

Kum 2013 atana chanchinbu lakna man la pe lo ten a rang lama pek theuh ni se. Chanchinbu chhutna hi press lamah thlatin Rs. 1,60,000/- chuang pek a ngaih thin avangin a man hi a luh that a ngai hle a ni.



Piler Branch KTP Diamond Jubilee hmanpuiin Pu Dingtea leh
Tv. Ruatkima, Piler Branch hruaitute nen (20.2.2013)



Kantu - Ramrikawn Branch

Postal Regn. no. MZR/81/2012-2014
RNI No. MIZMIZ/2009/29074



THLENOTU USHERS & RECEPTIONISTS



CKTP & ORGANISING COMMITTEE



FAKNA INKHAWM @ SAJKUTI HALL



LAMTUAL @ Lunglei Chanman Blak In



MIZORAM SYNOD CHOIR & PRESBYTERIAN CHOR



ROREL INKHAWM RUAI



BIAK INAH KAN LENO LO THIN A,
Pawn Lam Thutna Pasaal Mawli tak Hnuai Pawh A Khat thin hie

march 1-3, 2013 @ lunglei
KTP ROREL INKKHAWM
Hlunnthla

Printed & Published by Zonunmawia, Synod Office, Mission Veng on behalf of Kristian Thalai Fellowship
Edited by R. Lalhmingthanga and printed at Synod Press, Mission Veng, Aizawl, Mizoram . Copies - 36,500